

Në pajtim me nenin 7, 8 dhe 9 të Ligjit për përdorimin e gjuhëve Nr- 02 / L – 37, të nenit 9 të Ligjit për Vetëqeverisje Lokale Nr- 03/L - 040 dhe të nenit 13 të Statutit të Komunës së Suharekës 01-Nr-8336 të datë 11.11.2008 Kuvendi i Komunës së Suharekës, në mbledhjen e mbajtur më datën 29.12.2008 miratoi:

RREGULLOREN PËR PËRDORIMIN E GJUHËVE

I. DISPOZITAT E PËRGJITHSHME

Qëllimi

Neni 1

Kjo Rregullore ka për qëllim që të rregullojë përdorimin e gjuhëve zyrtare në pajtim me dispozitat e Ligjit për përdorimin e gjuhëve nr. 02/L – 37, në punën e organeve komunale, institucionet arsimore, shëndetësore dhe ndërmarrjeve publike komunale, që qeverisen nga Komuna.

Neni 2

Gjuha shqipe dhe gjuha serbe, si gjuhë zyrtare në Kosovë, janë të barabarta sa i përket përdorimit të tyre në të gjitha organet e administratës komunale, institucionet arsimore, shëndetësore dhe ndërmarrjet publike të Komunës së Suharekës.

II. PËRDORIMI I GJUHËVE

Përdorimi i gjuhëve në takime zyrtare, në tubime publike, në mbledhje të Kuvendit të Komunës

Neni 3

- 3.1 Gjuhët zyrtare përdoren në baza të barabarta në takimet me qytetarë, në punën e organeve të administratës, në kolegjiunin e drejtorëve, në komitetet e përhershme dhe në komitetet tjera, si dhe në mbledhjet e Kuvendit të Komunës;
- 3.2 Sektori për punë të përgjithshme administrative në Drejtorinë e Administratës, do të mundësojë përkthimin nga një gjuhë zyrtare në tjetrën, nëse kjo kërkohet për takimet zyrtare, takimet publike, takimet e komiteteve dhe takimeve të tjera të organizuara nga Komuna;
- 3.3 Procesverbalet nga mbledhjet, e kuvendit dhe komiteteve, mbahen në gjuhët zyrtare.
- 3.4 Statuti i Komunës, Rregullorja e punës së Kuvendit, rregulloret komunale dhe vendimet që miratohen në Kuvendin e Komunës, shtypen në të dy gjuhët: në gjuhën shqipe dhe serbe.

Përdorimi i gjuhëve nga individët, institucionet, shoqëritë tregtare, organizatat etj

Neni 4

- 4.1 Secili person i cili i drejtohet Organit të Komunës ,institucionit arsimor ,shëndetësor apo ndërmarrjes publike komunale, e ka të drejtën e përdorimit të gjuhës së tij , në të shkruar dhe në të folur.
- 4.2 Nocioni “gjuhë e palës”, ka kuptimin e gjuhës në të cilën pala fillimisht i është drejtuar Komunës.

Neni 5

Komunikimi me komunat tjera të Kosovës, institucionet e Republikës së Kosovës, shoqëritë tregtare, organet dhe organizatat tjera mund të bëhen në gjuhën shqipe dhe në gjuhën serbe.

3. Përdorimi i gjuhëve në emërtimet zyrtare dhe shenjat zyrtare

Neni 6

- 6.1 Emrat zyrtarë, të organeve komunale, të institucioneve arsimore , shëndetësore dhe ndërmarrjeve publike të Komunës së Suharekës, janë të shkruara në gjuhët zyrtare në përdorim në Kosovë.
- 6.2 Shenjat zyrtare që tregojnë emrat e fshatrave, të lagjeve, të rrugëve dhe të vendeve tjera publike, duhet të jenë të shkruara në të dy gjuhët: në gjuhën shqipe dhe serbe.

III. DISPOZITAT KALIMTARE DHE TË FUNDIT

Neni 7

Kjo Rregullore mund të ndryshohet në procedurë të njëjtë me atë të miratimit.

Neni 8

Në rast të mospajtimit mes dispozitave të kësaj Rregulloreje dhe Ligjit për përdorimin e gjuhëve, do të mbizotërojnë dispozitat e Ligjit për përdorimin e gjuhëve.

Neni 9


Pas miratimit në Kuvendin komunal, kjo Rregullore hyn në fuqi 15 ditë pas dërgimit në Autoritetin mbikëqyrës, në kuptim të nenit 81 të Ligjit mbi vetëqeverisjen lokale.

KUVENDI I KOMUNËS - SUHAREKË

01-Nr- 8853
Më datë 31.12.2008



Kryesuesi i Kuvendit


Rexhep Kuçi